

M239: Wernher v. Niederrhein: Die vier schiven

- 0,1 alle di dâ sint getoufet .
0,2 di unser hêrre widere hât gekoufet .
0,3 got der vile guote .
0,4 mit sîneme unschuldigen bluote .
0,5 di sulen vlîzigen dâr ane .
0,6 daz di minne an ireme herzen wone .
0,7 di got selbe gebôt .
0,8 alse di apostele hânt gehoehet .
0,9 daz sî aller tugende aneginne .
0,10 daz man got mit herzen minne .
0,11 unde unse næhesten . uns selben gelîche .
0,12 dâ mite kumen wir zuo himelrîche .
0,13 dar leitent uns vier strâzen .
0,14 di en sulen wir uns niet unkündic lâzen .
0,15 ich wæne daz iz sente Paules rât . sî .
0,16 hê sprichet in caritate radicate .
0,17 hê sprichet “in der minne sulet ir wurzelen entvâhen .”
0,18 daz wir mügen verstân .
0,19 welich sî di tiefe unde di lenge .
0,20 war uns di breite unde di hoehe brenge .
0,21 daz sagen ich iu . mit einen worte .
0,22 daz sint des heiligen kriuzes vier orte .
0,23 dâ man unseren hêren ane hienc .
0,24 dô hê di vier ende der werelte zuo ime vienc .
0,25 willet ir nû gedagen .
0,26 von den vier enden wile ich iu sagen .
0,27 si wâren wîlen vore gesaget .
0,28 sô Salomon in canticis canticorum klaget .
0,29 willet ir wizzen waz di klage sî .
0,30 Salomon sprach “nescivi .”
0,31 daz quît hê en wiste es niet .
0,32 wie iz mir nû sô geschiet .
0,33 nochdanne klaget hê mêr .
0,34 “animus meus conturbavit mê .”
0,35 daz quît “mîn muot hatte mich betrüebet .”
0,36 daz hân ich nû êreste geprüevet .
0,37 nû bin ich kumen an den rehten stap .
0,38 propter quadrigas Amminadap .

0,39 daz quît von Amminadapes rîtwagene .
0,40 es is uns ein teil zuo sagene .
0,41 Amminadap .
0,42 was des grôzen Judas mâc .
0,43 wart eine vrouwe ûzer zweier geslehte geboren .
0,44 di got zuo einer muoter hatte erkoren .
0,45 Amminadap was ein man von grôzer maht .
0,46 alle di sturme di hê vaht .
0,47 die vaht hê alle mit sinnen . unde mit witzen .
0,48 unde en wolte niemer von sîneme reitwagene gesitzen .
0,49 den zugen vier ros ebensnelle .
0,50 si hatten einen guoten willen .
0,51 ûf vier schîben ran di wagen .
0,52 daz gediute unhæle ich iu sagen .
0,53 Salomon dê dâ klaget .
0,54 alse di rede vore hât gesaget .
0,55 daz is di arme judenschaf .
0,56 di klaget daz dâr ie . sô geschach .
0,57 daz enzît si niet en wiste .
0,58 di vorezeichen von deme heiligen Kriste .
0,59 sô en hette siu nie daz ane gegangen .
0,60 daz hê an daz kriuze . wære gehangen .
0,61 Amminadap di sô mehtic ist .
0,62 di bezeichnenet den heiligen Krist .
0,63 hê bezeichnenet in alsamen .
0,64 mit der tât unde mit deme namen .
0,65 der reitwagen dâ hê ûf saz .
0,66 daz ist der kristenheite lichtvaz .
0,67 der heiligen êwângêlien lêre .
0,68 niet liehtes des man wirs entbære .
0,69 di vier ros di dâ vore giengen .
0,70 unde ire dinc sô einmüeticlîche ane viengen .
0,71 unde den wagen sô lîhtlîche dunsen .
0,72 daz sint di êwangelisten di niet en lugen .
0,73 an worten unde an tæten .
0,74 des wart ire gebot volle stæte .
0,75 unde bekant vile bereite .
0,76 über al di werelte breite .
0,77 ûf vier schîben lief der wagen .
0,78 welich di wæren daz wile ich sagen .
0,79 di eine was unsen hêren geburt .
0,80 des was uns allen sunderen durft .
0,81 daz ander was sîn heilic tôt .
0,82 den hê leit vûre al der werlte nôt .
0,83 daz dritte was sîn kreftic ûferstende .
0,84 dâ mite uns lôste von des tiuveles benden .
0,85 daz vierde was sîn wunderlîche hinevart .
0,86 dâ mite uns der wec dare geoffenet wart .

0,86a von den vier schîben .
0,86b mit heile müezen wir belîben .
0,87 ob nû des ieman denke .
0,88 daz ich von mînen gedanke .
0,89 di schîben sus begate .
0,90 di sehe den saltær an eineme blate .
0,91 wâ dâ geschriben stâ .
0,92 “vox tonitruî tuî in rota .”
0,93 daz quît “stimme dînes doneres an der schîben .”
0,94 willet hê den worten beklîben .
0,95 biz hê es zuo grunde müge kumen .
0,96 hê sihet wole wâ ich iz hân genomen .
0,97 nû en weiz ich ob einic donerslac .
0,98 vreislicher wesen . mac .
0,99 danne der in dem êwangêlie steit .
0,100 dê von deme urteile geschriben steit .
0,101 sô unse hêrre sprichet zuo den leiden .
0,102 di von deme lîbe sint gescheiden .
0,103 “varet vervluocheten in daz êwige viur .
0,104 di wonunge di ist iemer iuwer .
0,105 di den tiuvelen is bereitet .
0,106 dâr nâch ir hât gearbeitet .”
0,107 di sich hier an sîn gebot niet en kêret .
0,108 hê wirdet denne donerslages erværet .
0,109 nû en hât ir niet vernomen .
0,110 wie dise vier schîben komen .
0,111 zuo den vier sachen .
0,112 dâ von sente Paulus hât gesprochen .
0,113 di doch alle sulen wizzen .
0,114 di daz himelrîche sulen besitzen .
0,115 di tiufe dâ ich abe sprach .
0,116 di offen ich sô ich verreste mac .
0,117 si trifftet zuo gotes gebûrte .
0,118 ich wæne iz ie tiefer wûrde .
0,119 wan daz ein maget gebar ein kint .
0,120 alsô beleip si iemer sint .
0,121 nû en is nieman di des vrâgen beginne .
0,122 den dise tiefe niet verwinne .
0,123 iz ist ouch vremede von in allen wîben .
0,124 daz si geberen unde maget belîben .
0,125 ob iz kein herze mac gesien .
0,126 wie daz mohte geschien .
0,127 sô merket wie daz wære .
0,128 daz si gebar unsen heilære .
0,129 man liset von kinderen drîn .
0,130 di getoetet solten sîn .
0,131 unde heizte einen oven alsô .
0,132 sluoc di vlamme al ûf hôh .

0,133 niun unde vierzic ellen .
0,134 dâ mite man si wolte quelen .
0,135 si macheten di pîne .
0,136 wider unseme trehtîne .
0,137 dô quam unser hêrre in sîner zierde .
0,138 under in was hê der vierde .
0,139 aldâ in deme viure .
0,140 unde machete im sîne maht vile tiure .
0,141 daz iz anders niet in was .
0,142 danne als ein wûnnicliche gras .
0,143 bestrôuwet mit deme touwe .
0,144 daz bezeichnenet unse vrouwen .
0,145 di dâ gebar âne sêr .
0,146 daz nie geschach keiner muoter mêr .
0,147 âne list si di geburt entvienc .
0,148 âne bûrden si dâ mite gienc .
0,149 di selbe kûninginne reine .
0,150 muoter unde maget eine .
0,151 si was daz allerêrste wîp .
0,152 di gote ie gelobete unbewollen iren lîp .
0,153 dô daz gelûbede was getân .
0,154 an der êwe . gebote muoste si stân .
0,155 daz is bî den meisten .
0,156 daz dû gote gelobes daz salt dû leisten .
0,157 hier mite was si gevangen genuoc .
0,158 ouch was geschriben an ein ander buoch .
0,159 daz hê iemer vervluochet wære .
0,160 di in Israhel niet en gebære .
0,161 hier gienc iz ûze deme spile .
0,162 des was allen kinden zuo vile .
0,163 dê ir den rât vûnde .
0,164 daz si in beidenthalp verwûnde .
0,165 iren magetuom leistete sô iz tohte .
0,166 unde doch muoter werden mohte .
0,167 solte si in der reinicheite vollestân .
0,168 sô en mohte si deme vluoche niet entgân .
0,169 welich rât sal des geworden .
0,170 des en vant si niet dô ûf der erden .
0,171 solte ir iet dâr zuo gevrumen .
0,172 der rât solte ir von deme himele kumen .
0,173 dô dâhte got an sîne gûete .
0,174 unde an der vrouwen ôtmüete .
0,175 hê sante ir sînen boten zuohant .
0,176 di was Gabriêl genant .
0,177 daz si sich niet en solte schamen .
0,178 di vrouwen gruozte hê si mit namen .
0,179 hê sahte di boteschaf unses hêren .
0,180 unde sprach dû en salt dich niet erværen .

0,181 der mæren daz ich dir sagen sal .
0,182 einen sun den dû tragen salt .
0,183 Jêsus wirdet hê genant .
0,184 daz quît hê ist unser heilant .
0,185 des antwurte di vrouwe mit grôzen zûhten .
0,186 si sprach “seltsæne mich daz dûhte .
0,187 solte man mich muoter nennen .
0,188 sô ich mannes niet erkennen .”
0,189 hê sprach . “des wile ich dir beginnen .
0,190 wie dû kint salt gewinnen .
0,191 der heilige geist sal an dîn herzen gehirmen .
0,192 des vürsten kraft sal dich beschirmen .
0,193 gesegenet bist dû vore allen wîben .
0,194 alsô is di vruht di an dir sal beklîben .”
0,195 di vrouwe sprach aber dô .
0,196 deme engele guotlîche zuo .
0,197 “sôwaz ich hoeren an dînen worten .
0,198 daz müeze got selbe vollebornen .”
0,199 hier entvienc der geloube diu maht .
0,200 hier worhte di gotes kraft .
0,201 hier schein di sunne durch daz glas .
0,202 unde was doch also ganz als iz êr was .
0,203 nû ne weiz ich waz ieman zwîvelen mac .
0,204 di der eselinne gebôt daz si sprach .
0,205 dê daz rôte mere tete offen stân .
0,206 unde sîne holden dâ durch gân .
0,207 sint si lange durre hatte gewesen .
0,210 sô wir in der alten ê . lesen .
0,211 unde des apgründes tiefe hât gemezzen .
0,212 unde des himeles hoehe niet en hât vergezzen .
0,213 di weiz ouch algereite .
0,214 des ertrîches breite .
0,215 unde weiz ouch wole .
0,216 aller tage zale .
0,217 dê daz selbe hât getân .
0,218 daz di vier elementa . niene mügen zuogên
0,219 unde sô vaste hât gebunden .
0,220 daz si sich von ein niene wendent .
0,221 di daz selbe hât gegeben .
0,222 daz diu erde ûf deme wazzere mac sweben .
0,223 von aneginne sô manigen tac .
0,224 daz si gesinken niene mac .
0,225 unde doch der trôn sô hôhe umbe geit .
0,226 unde der mâne der erden sô nâhe stêt .
0,227 unde sîn licht von der sunnen entwæhet .
0,228 unde der hitze niene hât .
0,229 di daz selbe hât gesat .
0,230 daz di sunne hât dâ mittes stat .

0,231 entzwüsch den mâne unde den sterren .
0,232 unde weiz aleine waz daz werre .
0,233 daz si niet rehte alumbe en geit .
0,234 alse der himel selbe teit .
0,235 dê di sterren sunder nennet .
0,236 unde aleine bekennet .
0,237 ire kraft unde iren ganc .
0,238 sumelich kurz sumelich lanc .
0,239 dê dâ zelet des meres griez .
0,240 daz anders niemanne en is geschiet .
0,241 unde dâr zuo alle regenes træne .
0,242 daz en dunket mich niet seltsæne .
0,243 dê dis alles mac walten .
0,244 daz hê sîner muoter reinicheit hât behalten .
0,245 alsus leistete si iren magetuom gote .
0,246 nâch der ê . gebote .
0,247 unde wart vrî von des vluoches drouwe .
0,248 unde ist nû zuo himelrîche vrouwe .
0,249 si is caelum claritas .
0,250 si zieret den himel alse di bluome daz gras .
0,251 si is di êwige porte .
0,252 als ir alle di werelt . bedorfte .
0,253 si is di rehte leitesterre .
0,254 ire genâde en is niemanne zuo verre .
0,255 si is rôse sunder dorn .
0,256 si is tûbe sunder zorn .
0,257 si is muoter der milticheite .
0,258 si is spiegel der reinicheite .
0,259 si is ruom alles himelisches gesindes .
0,260 si is tohter ir selbes kindes .
0,261 si gebar iren schepfære .
0,262 dechein wunder en weiz ich mære .
0,263 dit is di tiefe dâ Paulus abe sprach .
0,264 ich ne weiz ouch waz tieferes wesen mac .
0,265 nû is zît daz ich bereite .
0,266 alsô vile sô ich . mac von der breite .
0,267 ich en weiz ouch niet alsô breit .
0,268 alse daz der himel unde erde umbe veit .
0,269 daz sich sô verre strecke .
0,270 daz zuo der hellen recke .
0,271 sô ich mich allerrehteste versinne .
0,272 daz is des almehtigen gotes minne .
0,273 di is sô lanc unde sô breit .
0,274 daz si aller werelte is bereit .
0,275 unde en teit niemanne sô leide .
0,276 daz hê ine dâr abe scheide .
0,277 mære wê sich selben dâr abe trîbet .
0,278 daz is dê dâ enbûzen belîbet .

0,279 anders ist si gemeine .
0,280 über grôz unde über kleine .
0,281 daz tet er wole schînen .
0,282 dô hê sich durch uns liez pînen .
0,283 heilic mennische unde gewâr got .
0,284 di dulte hunger unde spot .
0,285 hê wart gesteinet unde gejaget .
0,286 ane gespûwen unde gehalsslaget .
0,287 mit besemen liez hê sich villen .
0,288 daz tet hê allez durch unsen willen .
0,289 hê wart gehangen als ein diep .
0,290 en hette hê uns niet vile liep .
0,291 hê ne hæte iz niet geliten .
0,292 vore den juden hette ez wole vermiten .
0,293 hê ne liez sîn ougen verbinden .
0,294 alse man teit den tumben . kinden .
0,295 sô man spottet bit den tôren .
0,296 man sluoc in in zuo den ôren .
0,297 unde hiez daz hê wîssagete .
0,298 di in den halsslageten .
0,299 dit vertruoc . hê bitalle .
0,300 sîne labunge daz was galle .
0,301 dit was vol unsüeze .
0,302 si sluogen ime nagele durch di vuoze .
0,303 unde in den selben gruoben .
0,304 di di nagele an daz kriuze hiuwen .
0,305 dâ wurden unse sünde begraben .
0,306 daz wâpen sulen wir iemer mit uns tragen .
0,307 daz is sô kreftic unde sô starc .
0,308 daz man vore deme tiuele dechein bezzerz en bedarf .
0,309 iz is des mennischen huote .
0,310 gezieret mit deme bluote .
0,311 daz ûzer unses hêren wunden vlôz .
0,312 ez en wart nie zierheit alsô grôz .
0,313 iz ist al der werelte êre .
0,314 und is leitere aller süntære .
0,315 ze wâre sît des gewis .
0,316 daz daz di selbe leitere is .
0,317 dâ di süntige Zacheus ûf steic .
0,318 dô ime unse hêre sîne hulde verlêch .
0,319 dit is ouch . di selbe stam .
0,320 dâ der tiuvel den apfel abe nam .
0,321 den hê Adâme unde Even bôt .
0,322 dâ ane âzen si den tôt .
0,323 daz obez truoc eine vruht .
0,324 des wart uns allen leider vluoch .
0,325 an des mennischen lîbe .
0,326 nû haben wir di arzâtîe .

0,327 von des obezzes ungesunde .
0,328 in den alten urkünden .
0,329 alse dâ geschriben steit .
0,330 dô di israhêlische diet .
0,331 in der wüestenunge lac .
0,332 daz der wurm durch sîne sünde starp .
0,333 di dâ verwundet swaz hê stach .
0,334 dô des volkes alsô vile verdarp .
0,335 dô suochte hê unses hêrren rât .
0,336 umbe di vreisliche tât .
0,337 ob daz volc iet des mohte geniezen .
0,338 dô hiez hê einen kupferîn slangen giezen .
0,339 unde gebôt daz man di slange .
0,340 hienge vüre daz volc an eine stangen .
0,341 di von deme wurme würde verhouwen .
0,342 hê solte den kupferîn slangen schouwen .
0,343 sô en mohten di wunden niemer solich werden .
0,344 hê solte harte wole genesen .
0,345 dise vorezeichen en sint uns niet verswigen .
0,346 wande wir in der wüestenunge ligen .
0,347 daz dâ stichet der wurm .
0,348 daz is des tiuveles . sturm .
0,349 dê deme mennischen in sîn herze sendet .
0,350 daz hê sich von sîneme schepfære wendet .
0,351 unde vellet in di houbetsünde .
0,352 daz sint der sêlen tôtwunden .
0,353 daz heilige kriuze is di stange .
0,354 dâ man vore uns hæhet den slangen .
0,355 den man von kupfere giuzet .
0,356 daz is der milte sun den manne kriuzet .
0,357 alse daz kupfer in den viure wirdet geprüevet .
0,358 alse wart unse hêrre in der martelunge . betrüebet .
0,359 sôweme der tiuvel tuot den slac .
0,360 di zuo der sêlen tôde werden mac .
0,361 hê sal îlen unde zouwen .
0,362 dâr hê müge beschouwen .
0,363 di marteles unses hêrren .
0,364 dâ sulen wir uns erværen .
0,365 daz hê sô vile durch uns hebet geliten .
0,366 unde wir decheine bôsheit hân vermiten .
0,367 willen wir uns rehte an deme spiegele schouwen .
0,368 sô en hât uns der tiuvel sô sêre niet verhouwen .
0,369 noch di wunde en mac niemer sô vreislich wesen .
0,370 wir en sulen ir harte wole genesen .
0,371 daz is umbe daz getân
0,372 daz di kriuze vore uns in der kirechen stân .
0,373 daz wir sîne marteles êren .
0,374 nû wile ich wider an mîne rede kêren .

0,375 dô unse hêrre an daz kriuze wart gehaben .
0,376 hê bat sich mit trinkene laben .
0,377 hê bat den genâden .
0,378 di ime di pînen tâten .
0,379 sîn gedult di was sô grôz .
0,380 der ouch jener genôz .
0,381 di in in sîne sîten stach .
0,382 daz saget uns di iz sach .
0,383 ein harte wârhafter man .
0,384 der êvangelista sente Johan .
0,385 daz von unses hêrren sîten quam gevlozzen .
0,386 des hât al di werelt genozzen .
0,387 daz was wazzer unde bluot .
0,388 iz wart nie prasem alsô guot .
0,389 iz ist aller arzâtîje bezziste .
0,390 iz vertîliget di hantveste .
0,391 dâ mite uns der tiuvel wolte behalten .
0,392 unde hât in got verschalten .
0,393 di wunde an unses hêrren sîten .
0,394 si was vûrekûmftic an den zîten .
0,395 dô Adâme der slâf ane quam .
0,396 unde unse hêrre von sîner sîten nam .
0,397 ein rippe unde machete ein wîp .
0,398 daz si beide wæren ein lîp .
0,399 daz von Adâmes sîten wart benomen .
0,400 dannen abe is unse vleischlîche muoter kumen .
0,401 daz von unses hêrren sîten quam gerunnen .
0,402 daz hât unse geistlîche muoter gewonnen .
0,403 alse vrîlîche ledicheit .
0,404 daz si niemer under des tiueles bôsheit .
0,405 doch hatte hê des gedâht .
0,406 di sêlen di wâren in sîner aht .
0,407 daz hê di wolte quelen .
0,408 unse hêrre di brach di hellen .
0,409 unde nam dâ einen kreftigen roup .
0,410 dô rouw den tiuvel der kouf .
0,411 den Judas tet mit sîneme râte .
0,412 di ruowe was al ze spâte .
0,413 dit is diu breite di Paulus meinet .
0,414 di minne di uns got hât bezeinet .
0,415 daz hê si an uns vinde .
0,416 sô sîn wir zuo himele gesinde .
0,417 nû merket von der lenge .
0,418 zuo welicher hoffenunge si uns brenge .
0,419 des en hâte ich niet gelesen .
0,420 daz einiger –[...] müge werden .
0,421 danne daz wir sulen ûf erstân .
0,422 als unse loesære hât getân .

0,423 dâr nâh en wirdet es niemer ende .
0,424 zuo welicher hant hê gewende .
0,425 durch vröuwede ob durch angest .
0,426 nû siet daz daz lanc ist .
0,427 daz man heizet "iemer ." .
0,428 daz en endet sich niemer .
0,429 iz ist ûz der mâze lanc .
0,430 iz en weiz decheines mennischen gedanc .
0,431 doch is leider liute vile .
0,432 di des gelouben habent vile .
0,433 als iz lît in der erden .
0,434 daz iz niemer lebentic en müge werden .
0,435 der tôt hatte daz ze eineme rehte .
0,436 sôwen hê an sîne gewalt bræhte .
0,437 di ne mohte niet wider kumen .
0,438 daz het ime genomen .
0,439 unse hêrre der heilige Krist .
0,440 mit einer harte schoener list .
0,441 di list di solet ir merken .
0,442 an eineme bîspelle daz wir wirken .
0,443 des ist harte vile geschien .
0,444 ouch weiz ich wole ir hât gesien .
0,445 wie der vischære di ane deme stade steit .
0,446 unde den visch mit dem angele veit .
0,447 daz wile ich iuch bewîsen .
0,448 hê gebôt eineme îsene .
0,449 alse hê wole hât gebogen .
0,450a sô hât hê iz danne bezogen .
0,450b mit eines wurmes vleische .
0,450c –[...] .
0,451 daz wirfet hê in den wâc .
0,452 sô vliuzet der visch dâr nâch .
0,453 durch di girigen spîse .
0,454 verslindet hê daz krumbe îsen .
0,455 unde geit iz ime durch di wangen .
0,456 sô is hê zuohant gevangen .
0,457 dâr kumet di angel durch gesloffen .
0,458 des belîbet di girige kele iemer offen .
0,459 nû solet ir vische vâhen .
0,460 der hôhe himel ist di stat .
0,461 dâ der vischære ûfe steit .
0,462 unde den visch mit dem angele veit .
0,463 daz îsen ist di goteheit .
0,464 der krefte niet wider en steit .
0,465 si erbouc sich durch ire güete .
0,466 unde zuo unser ôtmüete .
0,467 dâr über was unse vleischheit bezogen .
0,468 des wart der girige visch betrogen .

0,469 zuo deme âse wart im alsô gâh .
0,470 daz entgalt hê dâr nâh .
0,471 daz mere daz ûf unde nider geit .
0,472 daz is di werelt di niemer gesteit .
0,473 di visch di dâ inne vert .
0,474 daz es der tôt di dâ vile verzeret .
0,475 hê ne kan nihtes geschônen .
0,476 des wolte got von himele ime selben lôn .
0,477 zuo kampfe giengen si beide dô .
0,478 unse hêrre kârte daz weiche dâr zuo .
0,479 unde hielt daz harte dâ inne .
0,480 daz en tete nieman ander .
0,481 si pflegent des al .
0,482 sôwie den kampf vehten sal .
0,483 daz hê sich dâ mite schiuret .
0,484 daz allerbezzeste vûre den slac . dûret .
0,485 daz en was unseme hêrren niet zuo tuonne .
0,486 hê was starc unde küene .
0,487 daz hê den tiuvel zuo kampfe gelocke .
0,488 sô vaht hê in deme kranken rocke .
0,489 in unse bloede mennischheit .
0,490 des bestuont in der tiuvel vile gereit .
0,491 wiste her di brünjen dâr unden .
0,492 hê en hette sich es nie underwunten .
0,493 hê sach in haben semfte gemach .
0,494 daz hê enkeiner sterke en pflac .
0,495 des wolte hê sînes süezen lîbes gesmacken .
0,496 daz arneten sîne kinnebacken .
0,497 si wurden ime sô wîten ûf getân .
0,498 daz si ime iemer offen sulen stân .
0,499 di visch dâ wir abe hân gesprochen .
0,500 deme di kele sus wart zuobrochen .
0,501 di hatte Jonam verslunden .
0,502 dô quam hê wider ûze sînen munde .
0,503 über alsô manigen tac .
0,504 also unse hêrre in der erden lac .
0,505 di visch bezeinet âne zwîvel .
0,506 den girigen tiuvel .
0,507 di sich al der sêlen underwant .
0,508 biz hê den angel verslant .
0,509 di zuobrach ime sîne wangen .
0,510 –[...] .
0,511 aldâ ime di kele wart zuobrochen .
0,512 dâ quam Maria Magdalena ûz gesloffen .
0,513 unde ander manic süntære .
0,514 des weges habe got lop unde êre .
0,515 doch was daz wunder grôz .
0,516 daz man Samsonem beslôz .

0,517 zuo Gazam züschē den porten .
0,518 dâr umbe von diu si vorhten .
0,519 daz hê stuont ûf in der naht .
0,520 unde brach hê mit sîner kraft .
0,521 di porzen beide nider .
0,522 di ne hiengen dâ niemer sider .
0,523 unde lôste sich von des karkærs nôt .
0,524 daz vorezeichente unses hêrren tôt .
0,525 der tiuvel wânte uns behalten an sîner gewalt .
0,526 dîne porzen di dâ nider wart gevalt .
0,527 stênt noch offen .
0,528 dâ kument ûz gesloffen .
0,529 di mennischen zuo dem urteile .
0,530 sumelîchen zuo quâlen sumelîchen zuo heile .
0,531 zuo welicher hant wir danne kêren .
0,532 dâ belîben wir iemer mêre .
0,533 dit ist di lenge dâ Paulus abe sprach .
0,534 ich en weiz waz langer wesen mac .
0,535 von der hoehe ist uns zuo sagene .
0,536 daz ist di vierde schîbe von dem wagene .
0,537 di bezeichnenet unses hêrren ûfvart .
0,538 schoener nie dechein en wart .
0,539 si mohte ouch niuwet hôher .
0,540 si is enbobaen der engele kôre .
0,541 dâ sitzet unse natûre ebenhêre .
0,542 des himeles schepfære .
0,543 dâr dienet al himeles gesinde .
0,544 der êwigen megede kinde .
0,545 vile rehte umbe mittetac .
0,546 dô deme tôde sînes rehtes gebrach .
0,547 unse hêrre mit sînen jungeren saz .
0,548 beide hê transc . unde az .
0,549 sînen jungeren hê bevalh .
0,550 als ein meister zuo rehte sal .
0,551 daz si von Jerusalêm niet en giengen .
0,552 êr si sîn gebot begiengen .
0,553 daz si dâ gehôrten .
0,554 von sînes mundes worten .
0,555 rehte umbe di selben zît .
0,556 sô man di sunnen zuo mitteme tage sît .
0,557 dô huop hê sich an des tages lieht .
0,558 zuo aller der anesiht .
0,559 den hê es wole gunde .
0,560 ein wolken quam an der stunte .
0,561 unde entvienc in in den luften .
0,562 dô sîne jungeren des verdûhte .
0,563 daz hê sô wunderlîche tæte .
0,564 mit wîzer gewæte .

0,565 sâhen si dâ bî in .
0,566 daz wole mohten zwêne engele sîn .
0,567 ire worte wâren si sô vrî .
0,568 si sprâchen “virî galileî .”
0,569 ob ich iz rehte gesagen kan .
0,570 daz quît “galilêische manne .
0,571 wes wundert iuch sô sêre .
0,572 in den selben gebæren .
0,573 sal hê zuo jungest kumen widere .
0,574 alse hê nû veret zuo himele .”
0,575 dise vart wart geruort .
0,576 dô Elias wart ûf geuort .
0,577 mit eineme viurigen wagene .
0,578 dâr ane wær uns lanc zuo sagene .
0,579 Elias kumet widere .
0,580 sîn mandel beleip hier nidene .
0,581 daz trifftet zuo den sachen .
0,582 daz hê noch des tôdes sal gesmachen .
0,583 unse hêrre hât sîn kleit mit ime genomen .
0,584 daz is di natûre di ime êr von uns ist kumen .
0,585 di hebet uns sô geerbet .
0,586 daz niemer enkein tût en stirbet .
0,587 di dâr gerechen kunne .
0,588 zuo deme heimuote daz hê hât gewonnen .
0,589 alle di nû von ime willen varen .
0,590 di neme bilede bî dem aren .
0,591 der are is der natûren .
0,592 in der luft mac hê lange dûren .
0,593 vore allen vogelen mac hê hôhe vliegen .
0,594 daz hê sîn ougen niemer en darf verliesen .
0,595 vore der sunnen sihte .
0,596 daz en geschiet anders decheineme vliegenden wihte .
0,597 di muoter ire jungen vuotet .
0,598 unde si sô lange behüetet .
0,599 daz si ire spîse mûgen ezzen .
0,600 unde sich zuo vliegene vermezzen .
0,601 sô swinget der vater boben daz nest .
0,602 unde locket si dâr ûz mit sîner list .
0,603 sôwanne hê danne entsebet .
0,604 daz sich ir kein zuo vliegene erhebet .
0,605 sô nimet hê ez danne in sînen vuoze .
0,606 unde vüert iz sô hê hôheste muoze .
0,607 dit sint grôze witze .
0,608 hê heltet si gegen der hitze .
0,609 di an der sunnen ist .
0,610 daz teit hê mit sîner list .
0,611 unde siet ime an di ougen .
0,612 ob iz di hitze mac getöugen .

0,613 en mac iz si danne niet liden .
0,614 alzehant . beginnet hê ez nîden .
0,615 sô missehaget ime di vuore .
0,616 wande iz ist gewonnen mit überhuore .
0,617 sô klemmet hê iz mit sînen vuoze .
0,618 unde læt iz vallen unsuoze .
0,619 daz iz zebristet ûfe der erden .
0,620 alsô en mac ir kein niemer valke werden .
0,621 di alsô werdent gezilet .
0,622 daz di muoter mit deme anderen spilet .
0,623 sôwelich zuo rehte wirdet gewonnen .
0,624 iz en kêret sîn ougen niemer von der sunnen .
0,625 si mûgen daz licht wole gedolen .
0,626 di sal der ander ouch zuo ime verholen .
0,627 der are gelîchet deme heiligen Kriste .
0,628 wir sîn di jungen in deme neste .
0,629 di muoter di uns vuotet .
0,630 daz is sîn genâde di uns hûetet .
0,631 der vater di uns minnet .
0,632 unde enboben uns swinget .
0,633 Moses saget uns daz .
0,634 “sicut aquila provocat .”
0,635 daz quît alse der are locke .
0,636 sîne jungeren zuo vlocke .
0,637 alsô hât unse schepfære .
0,638 der himelkûninc hêre .
0,639 sîne vlûgele gespreitet .
0,640 dâ mite hê uns leitet .
0,641 in sînes vater rîche .
0,642 dar leite hê uns algelîche .
0,643 der sunnenschîn ist daz starke gebot .
0,644 daz uns gap der gewaltige got .
0,645 daz wir unsen ebenkristen . minnen .
0,646 mit herzelîchen dîngen .
0,647 von deme daz uns leide ist geschien .
0,648 di des niet en mac gesien .
0,649 daz hê daz gebot geleiste .
0,650 sîne muoter ist bewollen mit eineme vremeden geiste .
0,651 alle di dâ tuont daz si wellen .
0,652 di vûerent sich selben in di hellen .
0,653 unde in der tiuvele gewalt .
0,654 der is dâ vile manicvalt .
0,655 sôwê sich dâr ane vlîzet .
0,656 daz dit gebot in sîn herze vliuzet .
0,657 wie hê sînen næhesten gelîche .
0,658 di vert vore zuo himelrîche .
0,659 in der engele koere .
0,660 sô en mohte hê niemer hoeher .

0,661 nû hât ir vier strâzen .
0,662 di man niemanne unkündic sal lâzen .
0,663 Dâvît sprichet umbe di einen .
0,664 ich wæne hê di breite meine .
0,665 sô ich mich allerrehteste verstê .
0,666 hê quît “exaudivit me in latitudinê .”
0,667 daz quît “in di breite hôrte hê mîne rede .”
0,668 daz mohte wole in der minnen sîn .
0,669 di lenge dâ ich aber abe sprach .
0,670 daz is daz sûeze vertrac .
0,671 des almehtigen gotes .
0,672 sô dicke sô wir verjien sînes gebotes .
0,673 sô læzet hê uns zuo buozen .
0,674 mit inniclicher gruozen .
0,675 êr hê uns mit sîneme rehten slâ .
0,676 hê sprichet “convertimini at mê .”
0,677 daz quît “kêret iuch ane mich .
0,678 sô sît ir iemer sælic .”
0,679 von einer tiefe wir hoeren zellen .
0,680 daz sî di quâle von der hellen .
0,681 dâ di unrehten .
0,682 di wider got vehten .
0,683 ire schulde solen arnen .
0,684 dâ vore wile uns got warnen .
0,685 zuo ime sô hât hê uns gespanen .
0,686 dâ sulen wir iemer mit ime wonen .
0,687 dâ sal unsich der engele spîse gesaten .
0,688 aldâ müeze hê uns bestaten .
0,689 durch sîner muoter êre .
0,690 dit tihtte der pfaffe Wernhere .